



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

**Äntwert vun der Ministesch fir Ëmwelt, Klima an nohalteg Entwécklung an der
Gesondheitsministesch op d'parlamentaresch Fro n°8229 vum 10. August 2023 vum éierewäerten
Deputéierte Här Sven Clement iwwert en "Comité interministériel pour une meilleure qualité de
l'air"**

De Comité interministeriell deen den honorabelen Deputéierten uschwätzt, gouf finalment net en Place gesat, wëll een e méi ëmsetzungsorientéierte Wee gewielt huet, dee vill méi staark op déi verschidde concernéiert Secteuren ausgeriicht ass:

Am Kader vun der Approbatioun vum Aktiounsplang zur Reduzéierung vun de Loftschadstoff (NAPCP) duerch d'Regierung gouf d'Instrument vum "Compatibilitéits Check fir Betriber" (ufanks "Nohaltegkeetscheck" genannt) en Place gesat. Dëst Instrument huet ënnert anerem d'Zil den Impakt vu verschidden ekonomeschen Aktivitéiten op d'Loftschadstoffemissiounen an domat och d'Loftqualitéit anzuschätzen; et adresséiert awer och nach aner Auswierkungen. Dëst Instrument gëtt vu Representanten aus verschidde Ministère genotzt well nieft den Ëmweltfroen och Wirtschafts-, Aarbechts-, Transport- an Energiefroen an dem Check adresséiert ginn.

Doniewent sinn an dëser Legislaturperiod awer och verschidden aner Pläng à jour gesat ginn, déi d'Loftqualitéit betreffen. An deem Kontext wär de "Plan national relatif à la qualité de l'air" an och den Update vum NAPCP ze erwänen. An dësen Aarbechte gouf et Ofstëmmungsprozesser, notament tëschent de Ministère déi den Transport an d'Landwirtschaft an hire Kompetenzen hunn.

De Loftqualitéitsplang huet ënnert anerem confirméiert, datt de Stroosseverkéier ee vun den Haaptgrënn fir Loftverschmutzung zu Lëtzebuerg ass. An dësem Kontext spillt d'Zesummenaarbecht tëschent dem Ministère fir Ëmwelt, Klima an nohalteg Entwécklung (MECDD) an dem Ministère fir Mobilitéit an ëffentlech Aarbechten (MMTP) eng zentral Roll. Béisid Ministère schaffen enk zesammen, fir d'Erausforderungen z'adresséieren, déi sech aus dem Verhältnis tëschent dem Verkéier an den Ëmweltfacteure Loftqualitéit a Kaméidi erginn.

Bei der Ëmsetzung vum nationale Loftqualitéitsplang (PNQA) an dem nationale Mobilitéitsplang (PNM) kucken de MECDD an MMTP sech beschtméiglechst ze koordinéieren. Während de Loftqualitéitsplang sech op d'Reduktioun vu Loftpolluanten an de Schutz vun der ëffentlecher Gesondheet konzentréiert, ziilt de Mobilitéitsplang drop of, d'Fortbewegungsmethoden an -infrastrukturen ze moderniséieren an se dobäi méi ëmweltfrëndlech ze gestalten. Et ass grad an dësen zwee Pläng, wou sech Synergien erginn, well se d'Visioun vun enger nohalteger Mobilitéit mat enger propperer Ëmwelt kombinéieren.

E konkret Beispill fir dës Synergië sinn zwee Pilotprojet'en déi aktuell an zwou ausgewielte Gemengen (Schëtter an Déifferdeng) an der Ëmsetzung sinn. Duerch eng nei Klassifizéierung vun de Staatsstroossen am PNM wäert et an Zukunft méiglech sinn, op verschiddene Plaze méi déifgräifend verkéiersberouegend Mesuren ëmzesetzen. Am Kader vun dem Pilotprojet goufen hei bestëmmte verkéiersberouegend Mesurë simuléiert, déi drop ofzielen, den Autosverkéier ze reduzéieren a gläichzäiteg d'Loftverschmutzung an de Kaméidi ze reduzéieren. D'Resultater vun dëser Etude droen dozou bäi, de positiven Effekt vu bestëmmte Mesuren op d'Loftqualitéit ze bewäerten. An Zukunft sollen dofir d'Verbesserung vu Loftqualitéit a Kaméidi eng wichteg Roll bei der Planung vu verkéiersberouegende Mesuren spillen.

Säit 2018 organiséiert d'Ëmweltverwaltung ausserdeem an Zesummenaarbecht mat der Klima-Agence all Joer Informatiounsversammlungen a Formatiounen fir d'Gemengen déi un der Stéckstoffdioxid-Miesscampagne am Kader vum Klimapakt deelhuefen. Bis haut hunn 68 Gemengen op d'mannst



LE GOUVERNEMENT
DU GRAND-DUCHÉ DE LUXEMBOURG
Ministère de l'Environnement, du Climat
et du Développement durable

während engem Joer un der Miesscampagne deelgeholl. All d'Rapporte mat de Resultater sinn op folgender Säit publizéiert:

<https://environnement.public.lu/fr/loft/air/mesures/campagnes-speciales/campagne-communes-NO2.html>

Tëscht der Industrie an der Ëmweltverwaltung ass e konstanten Austausch d'Reegel, insbesonnesch och wat d'Loftschadstoff er ugeet. Dobäi gëllt jo de Prinzip vun de „meilleures technologies disponibles“ d.h. wann e Betrib méi emetteiert, ewéi d'Valeuren aus de meilleures techniques disponibles entsprécht, muss en sech besser opstellen. Esou eppes am lafende Produktionsprozess ze änneren ass net ëmmer einfach ëmzesetzen an hält eng gewëssen Zäit an Usproch.

Et ass och ze erwänen dass de Gesondheitsministère aktuell um éischte Plan national santé environnementale schafft, wou et em Facteuren an eisem Ëmfeld geet (chemesch Substanzen an eise Produit'en a Liewensméttel, Bannen- a Bausse-Loftqualitéit, Kaméidi, elektromagnéitesch Stralungen, Urbanismus...) déi e potentiellen Impakt op d'Gesondheet an d'Wuelbefanne vum Mënsch kënnen hunn. Een interministeriellen Aarbechtsgrupp, zesummegeat aus Verrieder vum Ministère fir Ëmwelt, Klima an nohalteg Entwécklung, souwéi vum Gesondheits-, Landwirtschafts- an Aarbechtsministère begleet d'Entwécklung vun dësem Plang a bréngt den néidegen Input.

Ënnert anerem geet et an dësem zukünftege Plang drëm, drop opmierksam ze maachen dass eng integrativ Approche soll gefuerdert ginn, wou déi betraffe Ministère aktiv zesummeschaffen a wou d'Gesondheet an d'Wuelbefanne solle mat consideréiert ginn, ganz nom Konzept "One health" an "health in all policies", wat vun der Weltgesundheitsorganisatioun (WHO) promouvéiert gëtt.

Interministeriell Zesummenaarbecht, déi och d'Acteuren vum Terrain an d'Wëssenschaftler integréiert, ass essentiel fir themeniwwergräifend an nohalteg Léisungen ze fannen déi eis et erlaben e gesond Ëmfeld fir déi ganz Populatioun ze schafen.

Lëtzebuerg, den 13. Oktober 2023
(s.) Joëlle Welfring
Ministesche fir Ëmwelt, Klima an nohalteg Entwécklung